

vn̄ messen mit dem Quadranten vnd Compas aller wege wassern/
 dern lēge vnd krümmen dardurch wahr zu nehmen/ bequemlich ges
 sehen kan/ als mit hülff der schrit oder ander mittel / nach der besten
 gelegenheit/ da man dan allwegen funff schreit für eine ruten / oder
 nach dem eines gang ist/ rechnen/ die kan man fleißig obseruieren vnd
 absehen/ des gleichen perfect auffzeichnen/ damit man solche nach dem
 verjüngten maßstab oder Scalam der meilen/ in die Carten conterfeis
 ten mag / welches ein jeder / so in dieser Materia ein wenig geübet/
 leichtlich wirdt thun können/ darumb wir weiter wort hievon zumas
 chen vnderlassen wollen.

Das neündte Capitel.

Darinnen gelehrt wird/ wie man ein Statt/ Vestung
 oder Castell/ nach dem verjüngten maßstab auff Papir in
 dem grund legen soll.

Dieweil es sich auch offtermals/ zutregt das man eine ganze
 Statt/ Vestung oder Castell/ nach dem verjüngten maßstab
 muß in gründe legen/ zu mancherley beförderung vnd nots
 turft/ als das man auff einem andern platz eine andere darnach absteck
 fen/ oder die selbe mit Bolwerken vnd wählen befestigen / belägern
 vnd beschleßen will/ oder vmb anderer vrsachen halben/ etc.

Solehes nun zu thun: so muß man / nach vnterricht des dritten
 Exempels im viertē Capitel dieses theils/ den gantzen vmbfang oder
 begriff der selber Statt perfect messen vnd auffzeichnen / als von
 winkel zu winkel/ allzeit die rechte lēge der seiten / vnd die weiten
 oder größe der winkel/ mit fleiß bemercken / des gleichen so man an
 Pforten/ Thurn/ Brücken/ Mülē/ Bolwerk/ Wachthaus/ oder was
 anders kompt/ muß man in solches mit fleiß auffzeichnen/ vnd die ort
 da sie stehen bemercken/ darnach also runderumb/ biß wider zu dem ort
 da man angefangen hat/ messen.

So nun der vmbfang vn̄ also begriff abgemessen/ so solle mā ferner
 auch messen vnd abzeichnen die dicke der mauren/ Pforten/ Brücken/
 wähl/ gräben/ bedeckte wege / vnd braiten der gassen oder strassen/ mie
 samp